

Govor visokog predstavnika Valentina Inzka na Forumu za prosperitet i zapošljavanje u BiH



Vrijedi izgovorena riječ.

Ekscelencije, dame i gospodo,

Veliko mi je zadovoljstvo biti danas ovdje s vama na završetku jednog fantastičnog događaja koji je obilježio pokretanje suštinski značajne nove inicijative da se Bosna i Hercegovina vrati poslu.

Na samom početku, dozvolite mi da iskoristim ovu priliku da pohvalim Evropsku uniju i ovdje u Sarajevu i u Briselu za posao koji je obavila na pokretanju ove inicijative.

Ona ima moju punu podršku i ne treba posebno isticati da je i moj ured spreman pružiti svaku vrstu pomoći u nastojanjima da se Bosna i Hercegovina vrati poslu.

Peter, ovo je stvarno odličan posao. Bravo!

* * *

Dame i gospodo,

Ovo su dramatična vremena i istinska kušnja za Bosnu i Hercegovinu i kao nikada ranije, ovoj zemlji potrebna je katarza i novi početak u kome će se interes običnih građana staviti na prvo mjesto.

Svi znamo da je i prije tragičnih poplava, koje su nanijele ogromnu štetu na velikim područjima ove zemlje, postojala očajnička potreba da se pokuša nešto novo kako bi se zaustavilo daljnje nazadovanje.

Jer, i previše vremena smo zauzimali pristup koji je omogućavao da ogroman broj ljudi bude bez posla, a još veći broj bez izgleda za bolju budućnost i bez sredstava za igranje aktivnije uloge u društvu.

Ovo govorim jer svi znamo da posao znači mnogo više od pukog donošenja hljeba na sto i plaćanja računa. Ako ne vratimo ljude na posao, onda ne samo da ih sprečavamo da igraju punu i aktivnu ulogu u društvu nego i stvaramo uslove da pesimizam uzme maha.

Bitka za stvaranje novih radnih mjesta za ljude u ovoj zemlji je mnogo više od bitke za bolji životni standard, jer smo svjesni da dostojanstven život jednostavno nije moguć bez posla.

U tom pogledu, stopa velike nezaposlenosti među mladima posebno je zabrinjavajuća, jer najtalentiraniji i najnadareniji mladi ljudi skoro po pravilu traže način da se pridruže mnogim njihovim zemljacima u inostranstvu.

Meni je svakako jako drago vidjeti Bosance i Hercegovce koji su uspjeli vani, ali došlo je vrijeme da se mladim talentima ove zemlje pruži prilika da ispune svoj potencijal kod kuće, a ne u inostranstvu i da u tom procesu stvaraju prilike i bogatstvo za cijelu zemlju.

Moja poruka najpametnijima i najboljima je jednostavna – vi trebate ostati i uključiti se u ovu inicijativu! Uz vašu pomoć možemo stvoriti nove prilike i izgraditi bolju budućnost ovdje u Bosni i Hercegovini.

Dame i gospodo, nakon ovih poplava mislim da se svi možemo složiti da nam je potreban konkretan napredak i to vrlo brzo.

Ali, odakle će doći ta promjena? Kontradiktornost je u tome da je promjena često rezultat najvećih iskušenja i najtežih iskustava, a tako mora biti i ovaj put.

Imajući na umu hrabrost i neumorne napore koje smo vidjeli u područjima pogođenim poplavama, sada je potrebno da se ova zemlja organizira i jedinstveno djeluje onako kako to nije bilo uobičajeno tokom prethodnih godina.

Duh solidarnosti i jedinstva koji smo vidjeli na poplavljenim ravnicama i dolinama ove zemlje trebao bi nam svima poslužiti kao primjer.

Građani ove zemlje pokazali su da ih ne zanimaju rasprave među političarima koje toliko dugo blokiraju ovu zemlju. Oni žele rješavati probleme zajedno sa svojim susjedima i vratiti ovu zemlju na svoje noge.

Iako ne možemo ponovo izgraditi Rim za jedan dan, ovo može biti dan u kojem ćemo se obavezati na promjenu. Danas možemo započeti razgovore koji bi, iskreno se nadam, mogli biti u središtu predstojeće predizborne kampanje.

Iskreno se nadam da će ovi razgovori rezultirati konkretnim mjerama koje će poduzeti budući organi vlasti u svim oblastima o kojima se razgovara u okviru radnih grupa – bilo da se radi o tržištu rada, poslovnom okruženju ili socijalnoj zaštiti.

Dosadašnje vođenje aktivnosti više ne dolazi u obzir jer ukoliko nastavimo raditi onako kako smo radili do sada, dobit ćemo iste rezultate kakve smo imali i do sada. Svima nam je poznato da ćemo, ukoliko nastavimo u ovom pravcu, ići putem koji vodi ne samo u sve veće siromaštvo i nazadovanje nego čak i u dublje podjele.

Ali ovdje ne govorim o etničkim podjelama, nego o istinskim podjelama u ovoj zemlji – podjelama na nekolicinu privilegiranih i ogromnu masu frustriranih građana koji se svakodnevno bore da sastave kraj s krajem.

Ova zemlja ima šansu za pravedniju, progresivniju i optimističniju budućnost, a mi tu šansu moramo iskoristiti za izgradnju takve budućnosti.

Nakon svih ovih godina političkog nadmudrivanja, neki od vas će pitati: Da li je moguće graditi takvu budućnost? Moj odgovor je: Moguće je!

Pogledajte kako je ova zemlja ranije uspjela provesti ogromne i važne reforme – pogledajte šta je postignuto s reformom odbrane i uvođenjem PDV-a.

Takve uspjehe možemo ponoviti, ali će oni zahtijevati suštinsku promjenu pristupa sa čim treba odmah započeti.

Završne napomene

Dame i gospodo, podrazumijeva se da je moj ured spreman podržati ovu inicijativu na svaki mogući način tokom svih faza njene implementacije.

Međutim, više nego ikada nam je potrebno da ove promjene artikuliraju i predvode domaće snage talentiranih, vrijednih i dobronamjernih građana ove zemlje.

Mnogi od vas, danas prisutnih, ćete biti sastavni dio napora na osiguranju promjena koje su neophodne.

Nekada to neće biti lako, ali niste sami i uspjeh ćete.

Želio bih iskoristiti ovu priliku da vam direktno kažem da ćemo stajati rame uz rame s vama dok se budete kretali naprijed.

Zajedno ćemo učiniti da Bosna i Hercegovina profunkcionira i završit ćemo posao koji smo započeli prije mnogo godina.

Danas je dan za obnovu naše opredijeljenosti da poduzmemo neophodne korake za otvaranje novih radnih mjesta i za prosperitet, koji su prijeko potrebni ovoj zemlji.

Nimalo ne sumnjam da ćemo se u godinama koje su ispred nas osvrnuti na ovaj skup i sjetiti ga se kao trenutka u kojem je ova zemlja počela na prvo mjesto stavljati želje njenih građana za zapošljavanjem, prosperitetom i životom dostojnim čovjeka.

Hvala vam.